

الأميرة الإسكندرانية



يعقوب صنوع

الأميرة الإسكندرانية

تأليف
يعقوب صنوع



الناشر مؤسسة هنداوي

المشهرة برقم ١٠٥٨٥٩٧٠ بتاريخ ٢٦ / ١ / ٢٠١٧

يورك هاوس، شبييت ستريت، وندسور، SL4 1DD، المملكة المتحدة

تليفون: ٨٣٢٥٢٢ ١٧٥٣ (٠) ٤٤ +

البريد الإلكتروني: hindawi@hindawi.org

الموقع الإلكتروني: <https://www.hindawi.org>

إن مؤسسة هنداوي غير مسئولة عن آراء المؤلف وأفكاره، وإنما يعبر الكتاب عن آراء مؤلفه.

تصميم الغلاف: ليلي يسري

الترقيم الدولي: ٩٧٨ ١ ٥٢٧٣ ١٨٧٠ ٠

صدر هذا الكتاب عام ١٨٧٥.

صدرت هذه النسخة عن مؤسسة هنداوي عام ٢٠١٩.

جميع حقوق النشر الخاصة بتصميم هذا الكتاب وتصميم الغلاف مُرخصة بموجب رخصة المشاع الإبداعي: نَسْبُ المَصْنَف، الإصدار ٤.٠. جميع حقوق النشر الخاصة بنص العمل الأصلي خاضعة للملكية العامة.

المحتويات

٧

٩

٢٥

أسماء الأشخاص اللاعبين

الفصل الأول

الفصل الثاني

أسماء الأشخاص اللاعبين

الخواجة إبراهيم: تاجر.

الست مريم: زوجته.

الست عديلة: بنته.

كارولينا: كماريرا.

الخواجة خربو: طبيب.

الخواجة لسان تور: أمير فرنساوي.

فكتور: عشيق عديلة.

حسانين: خدام مصري.

هذه الكوميديا حدثت منذ مدة في سكندرية.

الفصل الأول

الملعب الأول

(ديوان بباب مدخل، وما بين الجهتين مفروش من أعظم المفروشات، ومنظوم بكراسي جميلة وسفرة في وسطه في بيت الخواجة إبراهيم.)

المنظر الأول

(كارولينا وحسانين)

كارولينا (وهي تنظّف الكراسي ولم تشعر دخول حسانين، فتقول): شوجل كتير في البيت دا، لكن كواجة يكل النهار دا يجي واخذ كدام جديد.

حسانين (ينظر كارولينا ويقول في سرّه): ما شا الله، يا دهوتي على جمال دي البنت، دا إيه دا! شيء يجنن، يارب تكون عشقتني زي ما عشقتها. يخي إنت مجنون يا واد؟ بالله رايحه تعشق فيك إيه وانتا مُسخة؟ يعني لو كان ربنا خلقني سنيور بـرنوطة من اللي يبقوا زي البلاصي على الراس كان يجرى إيه في الدنيا؟ كنت أقول لها: سنيورة، بونو بونو. وهي ترد عليّ بحسّها الجميل وتقول لي: كرسي كرسي. يا محلا دي الكلمة. هُس، أهي رايحة تبص لنا. يا سلام، دول عيون دول ولا إيه؟ الله أكبر.

كارولينا (تلفتت وتقول): هيا إنتي الكدام الجديدة؟
حسانين: هو أنا يا روعي.
كارولينا: عاوز تروخي فين؟
حسانين: أروح؟ أروح إزاي وأفوتك؟ ليه؟ أنا أكلت بعقلي حلاوة؟ أنا باقول لك يا روعي، يعني روعي اللي في بطني. فهمتي؟
كارولينا: أنا روعي؟ أنا موش تروخي؛ أنا في شُجَل هنا.
حسانين: دي تلطميس ما تعرف الجمعة من الخميس.
كارولينا: إنتي اسمه كميس؟
حسانين: يا غرامي هوا أنا عبد؟ أنا اسمي حسانين ياختي.
كارولينا: ها خسانين دا اسم كويس كتير.
حسانين: يا فرحتي، أديني عجبته.
كارولينا: إنتي كنتي في بيوت قبلا من هنا؟
حسانين (في نفسه): دي بتقول إيه؟ (إلى كارولينا) ما تفسّري، بيوض يعني إيه؟
كارولينا: إنتي موش عارف أنا أكلم إيه؟ أنا كلمت إنت كنت في بيت ناس تاني؟
حسانين: أُمال إيه؟ كنت في بيوت كتير.
كارولينا: طيب ودلوقتي إنتا يعوز إيه من أنا؟
حسانين: أعوز إيه؟ أعوز أشاهدك.
كارولينا: روعي اكنسي أوضة بتاع سفرة.
حسانين: ما عجبهاش الكلام، ما يجيش منه يا ولد (ثم يخرج).

المنظر الثاني

(كارولينا فقط)

كارولينا (في نفسها): الكدامة دي مجنون، إذا كان هو فيه راس هوا يعملوا هنا جنيهات زي أنا، معلوم، أنا في واحد سنة في سكندرية دي. أنا جيت موش كمسة فضة في جيبو أنا، ودلوكت أنا فيه. فيه من جنيهات صفرات إنجليزي. أنا عملتو دول موش بخاجات بطالات، لا، أنا بنت طيب. أنا يمشي دوجري. هنا في البيت دي الكواجات اللي يجو كل ليلة يلعبوا وركات، والي يكسبوا يدي شويا فرنكات للكماريرا، وكمان في الكواجة

يوسف، هو يخب الست الصجيرة ويديني مكتوبات على شانها، وهيا كمان تديني مكتوبات على شان هوا، والمكتوبات دول موش بلاش دول بفلوس. والله مسكين الخواجة يوسف، هو عاوز يتجوز الست الزجيرة، والخواجة الكبير موش تكول لا، بس المدام — كُبة تشيلو — موش عاوز يسمع الكلام دي. هيا عايز واخد فرنساوي، باشا كبير. والله هي مجنون. هُس الكواجة يجي.

المنظر الثالث

(الخواجة إبراهيم والمذكورة)

إبراهيم (إلى كارولينا): صباح الخير يا بنتي.

كارولينا: يزيد صباحك يا سيدي.

إبراهيم: الست صحيت من النوم؟

كارولينا: لع يا سيدي الوكت بدري. إنتي عاوز أنا أكوم هيا؟

إبراهيم: معلوم، الوقت راح صرنا الظهر. روجي صحيا وقولي لها إني أريد أكلها.

كارولينا: طيب يا سيدي. حاضر يا كواجة (تخرج).

المنظر الرابع

(إبراهيم فقط)

إبراهيم (يجلس على كرسي يتنهّد يقول): ياما الإنسان يتأسف لما يتفكر في أحوال الدنيا. أهو أنا كنت رجل على قدر حالي، تاجر صغير، ألحس سنّي وأبات مهنيّ. رزق يوم بيوم والنصيب على الله. وكنت مبسوط أربعة وعشرين قيراط. وفي وقتها زوجتي كانت ما تنظرشي إلا لأشغال بيتها. لا تحب الخروج ولا الدخول زي النسوان الآخرين. وكانت مهنيّاني. أما تعالى لدلوقتِ اللي ربنا فتح علينا بأبواب الفرج وصرت غني وتاجر عظيم وشهير، احتاطت بي جميع الهموم، والسبب في ذلك تكون مراتي؛ لأنها صارت تقلد المدامات إيّاهم، وكل صيفيّة ما يصحّش إلا تروح باريز تنتنط وتعاجب كأنها ست صغيرة. وإذا قلت لها: السنة دي ما أقدرش أروح معاكي لكثرة الأشغال فتوجد لها ألف من يروح

معها، فالتزم أروح معها وإلا أشوف وأسمع ما أكره وأصير من عائلة التيوس. آه يا سوء بختي، ربنا يلطف. وأما عيشتي أنا مثل الزفت وأحسن. من صباحات ربنا أنزل على البنك. وبينما أكون أنا في مجادلات ومنازعات مع تجار وسماسرة وما أشبه ذلك، وحضرة الست تستقبل زيارة جُملة جدعان نماردة، لا لهم شغلة ولا مشغلة إلا بيت يشيلهم وبيت يحطهم. يضحكوا على واحدة، ويسلبوا عقل الثانية، وأحياناً يتقاتلوا على الست من دول من غير ما يعلم بشيء المسكين زوجها. وفي الحال الناس تحكي في حقه وفي سيرتها، وتكبر العبارة ولو كان أصولها حاجة هزيان. وأما بعد الظهر الست في لزوم تخرج تشم هوا بعربية لوحدها؛ لأنني إذا أردت أروح معها تتركب لي الدنيا وتقول بأعلا حسها: الموضة مهياش كدا؛ الست لازم تخرج لوحدها؛ لأن إذا خرجت مع زوجها يقولوا عليها الستات الآخريين: دي مالهاش كفاليير يتبعها على حصان! يخى الله يلعن الكفاليير والحصان والفُسحة وساعة ما صرنا أغنيا. أنا والله أحسد الرجالة اللي نسوانهم ما يعرفوش الموضة والآلافركه.

المنظر الخامس

(الست مريم والمذكورين)

مريم (تدخل من الباب الشمال وتقول): يعني يحل من الله إنك تصحينا بدري كدا؟
يعني تكسب من الأذية دي كتير؟ معناها لطيف جنابك؟
إبراهيم: نعم يا ستي؟ بتقولي إيه؟ بقا الوقت بدري ونحن صرنا تقريبا الظهر؟ لا حول ولا قوة إلا بالله العلي العظيم. مقبول يا ستي.
مريم: ما تقولش ستي؛ اتعلم لك كلمتين فرنساوي على آخر الزمن وقول مادام.
فهمت؟

إبراهيم: طيب يا مدام، بقا أنا بدي أخبر جنابك يا مدام إن الحوايج الذي وصيتيني عليهم في باريز أُمم جاءوا بالسلامة.

مريم: بعد إيه يا موسيو؟ معالھش بقا ما عندكش أخبار غير دي؟
إبراهيم: لا يا ستي، لا يا مدام.

مريم: الحمد لله لإني ظنيت إن عندك جواب من الواد يوسف وبدك توريهوني. أنا باستعجب إزاي تجاسر ويطلب يتزوج عديلة؟! والله إنه ما يختشي لأنه قطعة واد كاتب لا هناك ولا هنا، وقال بدّه يناسب تُجار عظام زينا، آدي الي بدّه يضرب راسه بالقباقيب العالية. وإنت يا مسيو ماتعرفش مقام نفسك؟ إنت كفالير مجيريه؛ يعني بقيت أمير، إنتا حماية قنصل فرانسّا، بقيت أفرنكي، عندك ملايين فرنكات، يعني بقيت باشة البانكيورات، وتريد توطّي نفسك وتاخذ لبنتك واد كاتب يقرف؟ إخص!

إبراهيم: يقرف؟ أيوا تعرفي منين إنه يقرف وإنتي ما شفتَهش إلا مرة واحدة ودقيقتين بس؟

مريم: يعني إنتا الي شوفته غير المرّة دُكها؟

إبراهيم: لا، لكن أنا بعرفه؛ لأن سمعت كل الناس بتمدح فيه وتشكره، وغير دا عديلة تحبّه زي عينيها.

مريم: تحبّه؟ دا إنتا ببيان لك كدة، دلوقت تشوف لما أوريها الجوابات الي وصلتنني الصبحيّة.

إبراهيم: جوابات إيه يا مدام؟

مريم: دا موش شغلك.

إبراهيم (يتنهد): معلوم، ما هو أنا قاعد هنا زي قواره.

مريم: معالَهش، النوبة دي رايحة أرحم عليك وأقولك السيرة إيه.

إبراهيم: يبقا فضل منك يا مدام.

مريم: إنتا فاكركونت لسانتور الي تعارفنا به في باريز؟

إبراهيم: فاكركه، الراجل الاختيار إيّاه.

مريم: اختيار أمّا لطيف.

إبراهيم: أيوا، دا كان دايمّا ما يفارقكيش مطرح ما تروحي. (في سرّه) الله يلعنه، دا كان عجوز وناقص.

مريم: تعرفش ابنه؟

إبراهيم: لا؛ لأنه كان بوقتها في بيلاد الإنجليز، وإنتي كمان ما شفتَهش.

مريم: صحيح لكن أبوه قال لي إنه شاب ظريف.
إبراهيم: طيب إيش دخل الشاب دا في الجوابات الي بتحكي عنهم؟
مريم: أعرف إن الكفالير فيكتور — لأن اسمه كدة — بقاله كام يوم هنا.
إبراهيم: الحمد لله بسلامته.
مريم: وليلة إمبراح شافنا في التياترو، ونظرنا نظرة وقعت في قلبه ألف حسرة.
إبراهيم: إزاي؟ الشاب عشقك إنتي؟ (في نفسه) دا يبقا أعما على الكلام دا.
مريم: لا موش أنا، دي عديلة الي عجبته قوي.
إبراهيم: على كل حال طيب، ولما عجبته؟
مريم: بعث لي الصبح جوابين، جواب من أبوه بيوصيني عليه، وجواب منه طالب القرب منا في عديلة. تقول إيه في النسب دا؟ دي قرابة تشرف؛ لأن أبوه كونه يعني تقريباً في درجة باشا، وهو بالضرورة يحصل درجة بيك، موش زي يوسف بتاعك الي ما يسواش نص.
إبراهيم: طيب وريني الجوابات أقراهم.
مريم: رح تفهم منهم إيه؟ دول بالفرنساوي. يا لله قوم ادخل أوضتك والبس زي الناس الي خلقها ربنا، وما تنساش تحط نيشانك على صدرك على شان ما يشوف إننا أمره زيّه، موش ناس كلشي انكان.
إبراهيم: طيب يا مدام، سمعاً وطاعة.
(يخرجوا الاثنين كل واحد من باب.)

المنظر السادس

(عديلة لوحدها)

عديلة (تدخل من الباب الوسطاني وتقول): آه، ماليش بخت، ربنا رزقني بأم قلبها زي الحجر، ما ينفعش معها لا بكا ولا دموع؛ لما وقعت في عرضها بإنها تسمح أتجوز يوسف الي أحبه، نطت زي الغراب وقالت لي: يوسف دا إيه؟ يقولوا عليه مين في العظمت؟ ما تستحش تحبّي واد مش من مقامك؟ قومي اتهندزي ويالله بنا على التياترو. فأنا التزمت أطاوعها، لكن ربنا يعلم بقلبي. مسكين يا يوسف، يا ترى قدر إيه انقهرت لما

الفصل الأول

سمعت إن ما فيش عشم في محبّتنا؟ لكن ما تخافش، والله القلب ما يعشق غيرك، أنا أفوت الدنيا على شانك. من صبر نال (تغني):

صبري فرغ يا جميل حُبك تلف حالي
... .. إلـخ

المنظر السابع

(كارولينا والمذكورة)

كارولينا (تدخل وفي يدها جواب): مدموازيل، الكواجة يوسف إديت أنا واخدة مكتوب على شان إنتا.

عديلة: هاتيه هنا.

كارولينا: كُدي يا ستي (تعطيها الجواب).

عديلة (تقرؤه سرًا وبعد ذلك تقول): يا روجي، قدر إيه بيحبني، هو مَيّت في هوايا. (تقرأ باقي الجواب في سرها وتقول) والله إن شورته جميلة، إذا صَحّت تبقا عناية من الله. وأما إذا لحظوا الجماعة! يخى الله لا يقدر، ربنا يستر.

كارولينا: المسيو والمدام يجي هنا.

عديلة (تخبّي الجواب في عبها): طيب روجي ما تكلميش حد.

كارولينا: موش تكافي يا ستي (تخرج).

المنظر الثامن

(إبراهيم ومريم والمذكورة)

إبراهيم (إلى عديلة): صباح الخير يا بنتي.

عديلة: يسعد صباحك يا بابا.

مريم (إلى إبراهيم): نَقَطْنَا بسكاتك.

إبراهيم (في نفسه): هنا الضربة والكتمة.
مريم (إلى عديلة): بون جور مافيليه.
عديلة (إلى مريم): بون جور ما مير.
إبراهيم (في نفسه): يعني ما يصحّش إلا تتكلم فرنساوي! إحنا الي تايه منا نص العربي.

مريم (تعطي عديلة الجوابين): اقري دول يا عيوني وشوفي أي عريس نقيت لك.
لا شك إنه يعجبك؛ دا شاب لطيف ظريف جميل عاقل وفصيح.
إبراهيم (في نفسه): الي هيا ما شافتوش وبتشكر فيه قدر كدا، إشحال بقا لما تشوفو؟ دي تبقا تقول عليه فريد عصره.

مريم (إلى عديلة): فهمتي؟ هوا ابن ناس وصدره مليان نيشانات.
عديلة (تأخذ الجوابات وتقرأهم سرًا، وبعد ذلك تقول): حاجة بهجة والله، طيب كتر خيرك يا ماما. أنا دايمًا أقول كدا، إن ماما ما تحب لي إلا الخير. إيش من كتابه دا لولي ما هوش خط. وأي كلام رقيق ما شا الله. دا أنا كمان شُفت المسيو دا إمبارح في التياترو.
مريم (إلى إبراهيم): شُفت يا عبيط، كلامي في محله والا لاء؟ فين محبتها في يوسف؟
إبراهيم (إلى مريم): يلعن جد الي فاهم من العبارة دي شيء، إزاي إمبارح كانت مسلوبة في حُب يوسف، وقالت لي إنها ما تاخدش حد غيره واليوم تنساه؟! (في نفسه) شيء ما يدخلش العقل، لازم يكون هناك داعي أو ملعوب، يخى طيب أنا بإذن الله أعرف أفك عُقدة الفن دا.

مريم (إلى عديلة): يا الله يا بنتي يا مدموازيل، روعي الشامبر بتاعك واتهندي؛ لأن الكفالير فيكتور جاي دلوقت.
عديلة: حاضر يا ماما (تخرج فرحانة).

المنظر التاسع

(المذكورين ما عدا عديلة)

إبراهيم (إلى مريم): من أين تعرفي إنه جاي دلوقت؟

مريم: دا موش شغلك إنت بس قول أيوا.
إبراهيم: وإذا كان عجبي أقول لا مثلاً؟
مريم: بردك تقول أيوا. فهمت؟ ولا تشوف حالك؟
إبراهيم: طيب يا مدام، بس ما تزعليش.

المنظر العاشر

(حسانين والمذكورين)

حسانين (إلى إبراهيم): يا سيدي.
مريم (إلى حسانين): كَلْمَنِي أنا يا شيخ.
إبراهيم (إلى حسانين): أيوا كلمها هيّا؛ لأن أنا (في نفسه) أنا ماليش حساب. الموت أحسن من العيشة دي.
حسانين (إلى مريم): بقا يا ستي.
مريم (إلى حسانين): هنا مافيش ستي.
حسانين: إزاي بقى لا سيدي ولا ستي؟ أكلم مين أُمال! أكلم الحيطان؟
مريم (إلى حسانين): إخرس يا قليل الحيا ولا قول يا مدام.
حسانين: طيب وريني مادام دي فين وأنا أقول لها.
مريم: أنا المادام.
حسانين: على عيني وراسي بقا يا ستي يا مدام.
مريم: مادام بس من غير كلمة ستي يا غشيم. اطلع برّا وابعت لي الكماريرا لأن باين عليك ما خدمتش خواجهات إفرنك زينا.
حسانين: لا يا ستي، لا يا مدام، لكن أتعلم.
مريم: طيب دلوقت عاوز تقول لي إيه؟
حسانين: إن في واحد خواجه برا طالب الدخول.
مريم: قول له يتفضل، وابقا دُق الجرس لما يكون الغدا حاضر.
حسانين: طيب يا مدام.

المنظر الحادي عشر

(المذكورين ما عدا حسانين)

مريم: إحنا لازمنا خدام فرنساوي يعرف طرايق الناس الأمّره. وصّي لنا على واحد بكرة لأن الخدامين العرب دول حمير. تيران الله في برسيمه.
إبراهيم: أمرك.
مريم: الكفالير فيكتور أهو داخل، يا الله تلحح وقوم استقبله.
إبراهيم: حاضر.

المنظر الثاني عشر

(الكفالير فيكتور والمذكورين)

فيكتور (بأظرف الملبوسات، بعيون قزاز على منخاره، وقطعة دقن طويلة تحت شفته، وبرنيطة طويلة سودة في يده، ويدخل من باب الدخول ويقول): إيتيل برمي؟
إبراهيم: اتفضل يا سيدي.
مريم: أنتريه مسيو لي شفالبيه.
فيكتور: مرسي مدام (يأخذ يد مريم ويقبلها ويسلم على إبراهيم).
مريم (إلى فيكتور): برنيه بلاس سيل فوبليه.
(جميعهم يجلسون).

إبراهيم (إلى فيكتور): حضرتك تعرف عربي؟
مريم (إلى فيكتور): فو بارليه لراب؟
فيكتور (إلى مريم): وي مادام. (إلى إبراهيم) أبقا يا سيدي سافيه، أنا علمتو في باريز كراية وكتابة عربي، وبعد ذلك روختو في شام سوا سوا عسكر فرنساوي، وكذلك اتعلمتو تكلمو كاليل.

إبراهيم (إلى فيكتور): حضرتك بتتكلم قوي طيب.
فيكتور (إلى إبراهيم): كدا أنا أفهمو كل إنتا تكول لي.
إبراهيم (إلى فيكتور): ما شا الله. وتعرف ألسن غير الفرنساوي والعربي؟
مريم (إلى إبراهيم بصوت خفي): معلوم، أُمال زيكَ إنتا اللي ماتعرفش غير لسانك؟
فيكتور: أنا أعرفو أتكلمو لسانات كتير: فرنساوي، تلياني، إنكليزي، نمساوي، مسكوفي، إسبانيولي، رومي، تركي، فارسي.
إبراهيم (في نفسه): يا خسارة إني ماعدتهمش، دول يجولهم دسطة وزيادة. يعني لو قال إنه يعرف تمانين لسان مين كان يكذبُه فينا؟
مريم (إلى فيكتور): وفين اتعلمت كل الألسن دي؟
فيكتور: أنا كنتو إنبسادور في فرانسَا وإنجلترا وأوستريا وروسيا وإسبانيا وإسطنبول وأتينا وجهات. وكمان كنتو مع العساكر الفرنساوي جنيرال في شام. وكذلك اتعلمتو دي كله.
إبراهيم (في نفسه): أدَي اللي يقول عليها لهجة فرنساوية. (إلى مريم) إنبسادور يعني إيه وجنيرال يعني إيه؟ في عرضك فهميني.
مريم (إلى إبراهيم): يعني الشي وساري عسكر. والله دي هتيكة وجُرسة إنك ماتعرفش فرنساوي.
إبراهيم (إلى مريم): والعمل؟ رايح أقوم أتعلم دلوقتٍ؟ بيقا صدق من قال بعد ما شاب ودَّوه الكُتَّاب!
مريم (إلى فيكتور): بقا حضرتك كنت إنبسادور وجنيرال؟
فيكتور (إلى مريم): وي مادام.
مريم (في نفسها): الحمد لك يارب اللي رزقتنا بنسابة زي دي. أبقا حماة واحد بيك ابن باشا تقريبًا، موش حماة واد كاتب.
إبراهيم (إلى فيكتور): وكيف بتعجبك إسكندرية؟
فيكتور: تريه جولي.
إبراهيم: أنا ما أعرفش الخواجة تريه جولي فين. هو صاحبك؟

مريم (إلى إبراهيم بصوتٍ خفي): إن ما سكّتش أنا أطق.
إبراهيم (إلى مريم): هُب، ما بقتش افتح فمي.
مريم (إلى فيكتور): الكفالير جوزي كان يعرف لسانات افرنكي كثير.
إبراهيم (في نفسه): آدي الكذب الي ما ينبعش.
فيكتور (إلى مريم): وهو إزاي نسيتهم؟
مريم: جات له سخونةٌ حامية أقوى من النوشه.
إبراهيم (في نفسه): الله لا يقدر. فالك في اسنانك.
مريم (إلى فيكتور): ورمته في الفرش زيادة عن شهرين. ولما طاب ما فضلش معاه إلا العربي.

فيكتور: هاه، دي الحرارة بتاع السكونة مسكتها في راسه.
مريم (إلى فيكتور): وي مسيو لي شفالييه.
إبراهيم (في نفسه): دول كمان شوية يقولوا عليّ بقيت مجنون!
مريم (إلى فيكتور): أنا قرّيت جواباتك، وقرّيتهم للكفالير إبراهيم جوزي وللمدموازيل عديلة بنتي. وبغاية حظي أقدر أقول لك إن طلبك مقبول. (إلى إبراهيم) موش كدا يا كفالير؟
إبراهيم: أيوا، أيوا، أيوا. (في نفسه) ملزوم أقول أيوا؛ لأن إذا قلت لأ يمكن يطلع معها تسمّعني كلام فارغ قدّام الراجل الغريب.
فيكتور (إلى مريم): مرسي مادام. أنا عجبني مدموازيل كثير كثير. وكمان الكونت لسانتور ابويا كبله أنا سافر من باريز يقول: إذا كان مادام تدّي لانتا مدموازيل أنا موش أقول لا.

مريم: بقا حضرة الكونت راضي؟
فيكتور: وي مادام.
مريم: إنكان لأمر كدا، اليوم بعد الظهر حضرتك والكفالير جوزي تروحوا قنصلاتو فرانساً لأن إحنا موش رعايا، وتعملوا اللازم للجواز.
إبراهيم (في نفسه): والله لما كُنّا رعايا كنا مبسوطين أكثر؛ لأن حكومة أفندينا حكومة عدل وإنصاف.

فيكتور: تري بين، تري بين. لكن أنا في شُجَل في مصر أنا لازم روح بُكرة الصبح ويفضل هناك اتنين جُمعة وبعدين أنا يرجع هنا.
مريم: طيب في غيابك نحضّر اللازم للفرح. كدا ثاني يوم وصولك نعمل الفرح.
إبراهيم: أيوا، أيوا، أيوا.

المنظر الثالث عشر

(عديلة (مُزَيَّنة بأفخر الملابس)، والمذكورين)

مريم (إلى فيكتور): أهي مدموازيل جات. (إلى عديلة) ادخلي يا حبيبتي.
فيكتور (إلى مريم): شارمان، شارمان (يقوم).
عديلة (إلى فيكتور): بون جور مسيو.
فيكتور (إلى عديلة): بون جور مدموازيل (يقدم لها كرسي وجميعهم يجلسون).
إبراهيم (في نفسه): دا إيه دا؟ دي البنت بتبصّ له وبتضحك له كأنها معرفة قديمة؛
دي شالت بُرُقع الحيا.

مريم (إلى عديلة بصوتٍ خفي): إزاي الحال؟
عديلة (إلى مريم بصوتٍ خفي): ما بقاش أعظم من كدا.
فيكتور (إلى مريم): مين يشوف المدموازيل ومش يحب هيا؟ هيا كتير كويسة، كتير جولي.

عديلة (إلى فيكتور): دا بس من لُطفك.
إبراهيم (في نفسه): ولا بتحمّرّش لما بتقول الكلام دا. مسكين يا يوسف والله اتنسيت.

مريم (إلى فيكتور): دول كل جدعان إسكندرية ميّتين في هوا بنتي.
إبراهيم (في نفسه): كلام زي الزفت وطالع.
فيكتور (إلى مريم): مادام، أنا لازم يروح اللوكاندة دلوقت؛ الساعة اتناشر.
مريم (إلى فيكتور): لا ما يصحّش، اقعد اتغدا هنا عندنا، وكدا بعد الضهر تروح القونصلاتو مع الكفالير إبراهيم.

فيكتور: كتر كيرك أنا موش يكدر، واحد نوبة تاني؛ واحد نوبة تاني أنا آكل هنا.
عديلة (إلى فيكتور): من فضلك شرفنا اليوم.
إبراهيم: أيوا، أيوا، أيوا.
فيكتور: مرسى مدموازيل، مرسى مادام، مرسى مسيو لي شفالیه.

المنظر الرابع عشر

(حسانين والمذكورين)

حسانين (يدخل وبیده جرس، ويقف ورا مريم ويدق من فوق راسها بالجرس ويقول): الغدا حاضر يا ستي مادام.
مريم (إلى حسانين): إنتا مجنون؟ أنا قلت لك دق الجرس برّا موش هنا. يالله اخرج (الجميع يضحكوا، فقط مريم تزعل للغاية).
حسانين: طيب يا ستي مادام، ما بقيتش أدق الجرس إلا في أوضة السفارة.

المنظر الخامس عشر

(المذكورين ما عدا حسانين)

مريم (إلى إبراهيم): تعجبك الهتيكة دي؟ إنت جرستنا بخدامك العرب، والله إذا كان ما تجيبش بكرة خدام فرنساوي أبقا أنا أعرف شغلي.
عديلة (إلى إبراهيم): الحق مع أمي.
إبراهيم: أيوا، العيب دايمًا عليّ أنا.
مريم (إلى فيكتور): اتفضل للغدا.
فيكتور (يقوم ويُعطي دراعه لمريم ويقول): مادام.
مريم (إلى فيكتور): مرسى (يخرجوا الاثنين).

إبراهيم (يمسك عديلة من يدها ويقربها إليه ويقول): فهِمّيني العبارة إيه؟ إنتي
إمبارح كُنّتي ميّنة في هوا يوسف، وإزاي اليوم نسيّتيه مرة واحدة؟!
عديلة (توشوش إبراهيم في أذنه، وبعد ذلك تقول بصوت عالي): فهمت؟
إبراهيم: الله الله، ما بقاش ألطف من كدا شيء.
عديلة: هُس ولا كلمة، ياالله ناكل.
(يخرجوا.)

الفصل الثاني

(ديوان صغير أقل من الموجود بالملعب الأول).

المنظر الأول

(مريم لوحدها)

مريم (جالسة على كرسي كبير وتحت راسها مخدّة، وظاهر على وشها تأثير المرض وتقول): أنا اليوم باحس أحسن نوعاً، ولكن لسا دبلانة. (تُخرج مراية صغيرة من عِبتها وتنظر نفسها فيها وتقول) دا إيه دا؟ إيه دا؟ شيء يصرع. إزاي بقا وشي كدا؟ وحمار خدودي راح فين؟ مين دا اللي طفا نورانية عيوني؟ يا خسارة، والله دي عين رديّة حسدتني. تشوشت خمسة عشر يوم وطلعت من العيا كأني طالعة من تُربة. (تتنهّد) نعمل إيه؟ هنا في إسكندرية الحُكما ما يعرفوش شيء. فينك يا باريز؟

المنظر الثاني

(إبراهيم والمذكورة)

إبراهيم: إزاي صحتك اليوم يا حبيبتي؟

مريم: أحسن شوية.

إبراهيم: الحمد لله.

مريم: قول لي، العريس رجع من مصر؟

إبراهيم: أيوا، رجع ليلة إمبراح، وأول سؤاله كان عنك.

مريم: بارك الله فيه. ابن الناس دايماً كدا.

إبراهيم: هوا جدع طيب.

مريم: وعديلة بتقول إيه؟ فرحانة به؟

إبراهيم: غاية الفرحة؛ في مدة غيابه كانت الجوابات رايحة جاية. وأي جوابات! كلام

حب وعشق.

مريم: يا بختهم، موش زيّنا احنا الي اتجوّزنا على العمياني بدون عشق.

إبراهيم: الله يرحم أيا منا. خلينا من الكلام ده. قولي لي، إنتي جاية معنا دلوقت في

القونصلاتو؟ لأن اليوم هو المُحدد على شان كتب الكتاب، والعريس أوعدني إنه يجي هنا

الساعة احداشر أفرنكي، يعني قبل الظهر بساعة، حتى نروح هناك سوى.

مريم: أنا لسه عيّانة ومانيش قادرة أقعد على حيلي. ومع كل ذلك الحكيم دلوقت

يجي ونسأله. فإذا كان يأذن لي بالرواح كان بها، وإلا روحوا انتو.

إبراهيم: طيب يا حبيبتي. (في نفسه) ألطف يارب وتقلّ سخونتها.

المنظر الثالث

(حسانين والمذكورين)

حسانين (إلى مريم): يا ستي مادام، الحكيم خربو بيسأل عليكي، أقول له يتفضّل؟

مريم: طيب قول له يدخل.

حسانين: حاضر يا ستي مادام (يخرج).

إبراهيم (يضحك ويقول إلى مريم): ما لاحظتيش النقط الي سقاه لك الخدام؟

مريم: إنتا ما تفلحش إلا في الكلام دا يا فلّاح.

المنظر الرابع

(الحكيم خرلبو والمذكورين)

خرلبو (إلى مريم): سباك الكير يا ستي.

مريم: يسعد صباحك.

إبراهيم (في نفسه): ما كنش ناقصنا إلا الرومي دا. (إلى الحكيم) اتفضل ارتاح.

خرلبو: أف خاريسوته.

إبراهيم: من فضلك اتكلم عربي.

مريم (إلى الحكيم): أيوا؛ لأن الخواجة من سوء بخته ما يعرفش إلا لسان العربي.

خرلبو: معالھش، أنا كمان أعرفو أتكلمو ويا هوا بالعربي. أنا اتعلمت طيبين الكلام

بتاع هوا. أنا عارف أقرا واكتب بولي كلاه.

إبراهيم: إنتا رجل شاطر وتتكلم عربي فصيح. (في نفسه) زي الزفت وأسخم.

خرلبو (إلى مريم): خضرتك أحسن النهار ده. وريني اللسان بتاع إنتي.

إبراهيم: حقًا يا خي لسانها طولها؛ لأن لما نزلت من بطن أمها الداية سحبتها منه

بتخمنه ديل.

مريم (تخرج طرف لسانها): ما هوش نضيف؟

إبراهيم (في نفسه): هوا يبقا في الدنيا اظفر من كدا؟

خرلبو (إلى مريم): افتحي فمك شوية سيادة، وطلًا اللسان بتاع إنتي برّا كالص

كالص.

مريم (تفتح فمها إلى آخره): كدا طيب؟

خرلبو: أيفا. أوه، في الفم بتاع إنتي حرارة كبيرة.

إبراهيم (في نفسه): والله ما صدقت إله في دي.

مريم (إلى الحكيم): والعمل إيه؟

خرلبو: واكدة شربة زيد كاروا وبالليل اتنين خوكنة. فهمت؟ وموش تكرر النهار

دي.

إبراهيم (في نفسه): لك الحمد يا رب.
مريم (إلى الحكيم): لكن أنا كنت عاوزه أروح القونصلاتو مع العرسان.
خرلبو: أكسن إنت إفضل في البيت. الكواجة إبراهيم يروح مع همان. وأنا كمان دلوقت لازم روح عند مادام القنصل. إيه هيا عيان وكدا أنا كول للقنصل حضرتك موش ...
مريم (إلى الحكيم): كتر خيرك.
إبراهيم: وشكر الله فضلك.
خرلبو: لا موش تخت خبر أنا خبيب بتاع إنتم وأنا لازم أعمل إنتم معروف، بكا مدموازيل رايخ يتجوز مع واخد جدد كويس.
مريم: حضرتك تعرفو؟
خرلبو: من زمان.
مريم: وتعرف أبوه؟
خرلبو: أبوه خبيب بتاع أنا.
مريم: هو راجل عظيم. هو كونت، يعني زي باشا.
خرلبو: مين باشا؟
مريم: أبو العريس.
خرلبو: يا ستي إنتي جلدان كثير كثير. أبوه كان واخد تجار زجيرين موش باشا.

إبراهيم (في نفسه): آدي الي رايح يفسد الي عملناه. (إلى الحكيم) إنتا ما انتاش فاهم الست والست ماهيش فاهماك. (إلى مريم) حضرتك يعرف أبو العريس قبل ما يحصل درجته العالية. فاهمة يا ستي؟
مريم (إلى إبراهيم): لا موش كدا.

المنظر الخامس

(عديلة والمذكورين)

عديلة (إلى مريم): صباح الخير يا ماما. كيف حالك؟ إنشالله تكوني صبحتي أحسن.
(إلى إبراهيم) وأنت يا بابا إزيك كدا؟ (إلى الحكيم) هو حضرتك هنا كمان؟ أتاري المحل منور. إزاي وجدت أمي؟ ماهيش أحسن من إمبراح؟ يعني تقدر تخرج معنا اليوم؟

الفصل الثاني

إبراهيم (في نفسه): والله عفارم يا بنتي، أما عشرة لهجة مليحة خلّت الجماعة ينسوا الي كانوا فيه.

خرلبو: مادام أكسن كثير، لكن موش يكدر يكرج. بكره هياّ يصبح طيبين كوي كوي. (يقف وينظر ساعته) الساعة أحداشر. أنا لازم أروح كاكيميره (يسلم على الجميع ويخرج).

المنظر السادس

(المذكورين ما عدا خربلو)

عديلة: والله الحكيم دا راجل طيب ومعتني بنا للغاية. هو طيبك يا ماما في أقرب وقت.

مريم: لكن في أقرب وقت غيرّ حالتي. ومين دا الي يشوفني دلوقتٍ ويعرفني؟ صبحت زي عود الخلة من بعد ما كنت زي غُصن البان.

عديلة (إلى مريم): بردك ترجعي زي ما كنتي وأحسن؛ ما تنقهريش.

إبراهيم (إلى عديلة): تنقهريه؟ البركة فيكي إنتي يا بنتي وفي جمالك. يعني أمك رايحة تتعاجب؟ (إلى مريم) باللهي عليك عاوزه تكوني كويسة ليه؟ رايحة تتمعشقي على آخر الزمن؟ (في نفسه) أديني فشيت غليلي والسلام.

مريم (إلى إبراهيم): أنا بالكلم بنتي يا مسيو وأنا ما باخاطبش جنابك، الي ما تعرف الدنيا فيها إيه. بقا أنا الي عجوزة؟ والله ما عجزني غيرك. لكن ما باليد حيلة، المكتوب على الجبين تراه العيون.

عديلة (إلى إبراهيم): يعني ما تغمّهاش إلا في فرحي؟

مريم: أنا أنعم من كلام راجل زي دا يا بنتي؟ وحياتك رُوحِي السي واتزوّقي أحسن العريس جاي ياخذك.

عديلة: طيب يا ماما بس صعبان عليا إنك مانتيش جاية معانا.

(تخرج.)

المنظر السابع

(حسانين والمذكورين)

حسانين: يا ستي مادام، العريس جا، أقول له يدخل؟
مريم: ودا شيء لازم له سؤال يا تور؟ قول له يتفضل.
حسانين: حاضر يا ستي مادام.
(يخرج.)

المنظر الثامن

(فيكتور والمذكورين)

فيكتور: بون جور مسيوه إيدام.
مريم: بون جور مسيو لي شفالبيه.
إبراهيم (إلى فيكتور): الحمد لله بسلامتك.
فيكتور: كتر كيرك. (إلى مريم) مادام كان أيان مدموازيل كتب لي أنا. إنشالله
دلوكت أحسن.

مريم: الحمد لله أحسن كثير. حضرتك ما شفتش لسه مدموازيل؟
فيكتور: لا، مدموازيل أنا لسه موش شفته من اليوم الي أنا يسافر في مصر.
إبراهيم: هيّا جاية حالاً.
مريم (إلى فيكتور): دخلت في أوضتها تجهّز نفسها للرواح.
فيكتور (إلى مريم): وحضرتك مادام موش يلبس على شان إيه؟ إنتا موش يجي مع
إحنا؟

إبراهيم: لا، الحكيم خربو حرج عليها ما تخرجش.
مريم (إلى إبراهيم): وجعت قلبي بانقاطك.

الفصل الثاني

فيكتور (إلى مريم): إذا أنا يعرف خضرتك موش يجدر يخرج أنا كنت أأكل للقنصلاتو ولكل الحبايب بتوع أنا إن بعد شوية يوم لما تطيب إنتي إحنا يعملوا الفرحة. **مريم** (إلى فيكتور): كتر خيرك يا ابني، لكن على شاني أنا ما أحبش إن فرحكم يتعطل دقيقة واحدة. وغير كذا ذات الفرحة هو في البيت. واللييلة معزومين عندنا جميع عمّد إسكندرية وجميع القناصل والزوات لأجل العشا والبالو. **إبراهيم** (إلى مريم): ونسيتي تحكي له على المزّيكات العال. **فيكتور**: بكا في فنتزية كتير كتير. أنا موش كنت مبسوط زي اليوم ديه.

المنظر التاسع

(عديلة والمذكورين)

عديلة (وجميع ما عليها أبيض وتاج ورد فوق راسها، تدخل وتقول إلى فيكتور): إننا من زمان هنا يا حبيبي؟ **مريم** (إلى عديلة): يخي سلمى عليه قَبْلا. كأنه الراجل لا سافر ولا جَا. **فيكتور**: موش تخت كبر يا مادام لما اتنين يخبو واخذ الثاني، موش لازم في كومبليمان بيناتهم. **إبراهيم** (إلى مريم): الحق معه. (إلى فيكتور وعديلة) يالله بنا لأن الوقت راح. **فيكتور**: ألون. **مريم** (إلى فيكتور وعديلة): تعالوا يا ولادي لما أبوسكم قبل ما تروحوا. (تبوسهم) ربنا يعطيكم السعد والفرح والهنا ويتمم عليكم بخير. **إبراهيم**: الله يسمع منك ويقبل دُعَاكي. **عديلة**: إنشالله في حياتكم. **فيكتور**: وي وي، في الخياة بتاع إنتم (عديلة وفيكتور يبوسوا يد مريم ويخرجوا مع إبراهيم).

المنظر العاشر

(مريم وبعد ذلك حسانين)

مريم (في نفسها): لك الحمد يارب الي ما خيبتش رجايا، وأعطيتني صهر أفتر به على الناس، موش واحد كلشي انكان زي الواد يوسف مثلاً الي كان يجرسني، وكنت أختشي أعرف الآخرين بأنه يقرب لي. أما صهري دا ابن ناس صحيح. والله بنتي لها بخت، موش زي حالي أنا الي وقعت في راجل ما يعرف تلت التلاتة كام.

حسانين (يدخل بسرعة ويقول لمريم): يا ستي مادام، يا ستي مادام، خاجة طويل عريض بدقن كبيرة (في نفسه) كأنها مقشّة جامع. (إلى مريم) أعطاني الورقة دي أورّيها لحضرتك.

مريم (تاخذ منه الورقة وتقرأها): دا الكونت لسانتور.

حسانين: بتقولي إيه يا ستي مادام؟ عاوزة تأمرني الطباخ يطبخ لسان تور على شان الغدا؟

مريم: إنتا حمار. إنتا خنزير. رُوح اطلع برا.

حسانين: دا إيه دا؟ أنا عملت إيه؟ ما هو إنتي الي بتقولي اطبخ لسان تور.

مريم: دا اسم الأمير. يالله أخرج وقول له يتفضل.

حسانين: حاضر يا ستي مادام (يخرج).

المنظر الحادي عشر

(مريم وبعد ذلك الكونت لسانتور)

مريم (في نفسها): يا هلتري الكونت عارف بخطوبة ابنه؟ لازم يكون كدة، حتى إنه جّا يحضر الفرح. قد إيه ينسر فيكتور لما يشوف أبوه، وجوزي كمان ينبسط منه لأنه يتكلم عربي طيب. دا اتعلموا في مدة سكنته في الجزائر والسنين الي قضاهم مع إبراهيم باشا.

لسانتور (يدخل بانسراح ويمد يده إلى مريم ويسلم عليها): حضرتك لسه مريضة؟ أنا وصلت هنا بقالي ست أيام وأول سؤالي كان عليك وعلى الخواجة إبراهيم، فأخبروني إن حضرتك عيانة بالنوشة، والخواجة إبراهيم دايماً مشغول بمينة البصل. في ثاني يوم وصولي سافرت على مصر، وهناك أقمت مدة إلا كم يوم دول، وحصل لي فيهم غاية الانسراح؛ لأن مصر الآن صارت مثل بلاد أوروبا، وموجود فيها تياترات وسيرك وجناين وسكك جداد وبنيات عظام مُفتخرة وقهاوي ولوكاندات وشيء يمخول العقل من أعجب شيء؛ فيجب على أهل مصر أن يكونوا شاكرين أفضل الخديوي الأعظم؛ لأنهم ما شافوش الأُملة دي إلا على أيامه.

مريم: الحق معاك، ولي مصر جعل كرسي مملكته جنة في أقرب وقت. لكن قول لي، ما وصلكش جوابات من ابنك ولا انتاش عارف هو فين دلوقت؟
لسانتور: يا ستي هو في الشام، وعن قريب يوصل هنا على شان ما نرجع سوى إلى فرانسا.

مريم (تضحك): بقا انتا ما انتاش عارف إنه وصل هنا من زمان؟ وشاف عديلة في التياترو وعجبته وطلبها منّا وأوراني جواب توصية منك؟
لسانتور: أنا صحيح أعطيته جواب توصية لكي، لكن موش على شان يخطب بنتك ويتجوزها.

مريم: مانا باقول لك جواب وصية فقط، لكن طلب الخطوبة منّا بجواب ثاني منه هُؤا.

لسانتور: موصوج وانتي رضيتي؟

مريم: طيب وإذا رضينا جرا إيه؟ يعني ما احناش من مقامكم؟ لله الحمد إحنا ناس مُعتبرين وأغنيا وكل الدنيا تشهد بكدا. وجوزي جالوا نيشان شفاليه مجيديه، وبنتنا ما حدش يقدر يحكي في حقها حاجة؛ بنت جميلة محتشمة كاملة الأوصاف. بقا زعلك ده معناه إيه؟ دا ابنك قال لنا إنه بيعت يستأذذك.

لسانتور: كداب يا ستي، في آخر جوابه ما جاب ليش السيرة دي. وغير كدا الجوزة دي ما تصحش مُطلقاً؛ لأنه خاطب بنت عمه في باريز، وإحنا ناس أُمرة ما نرجعش في قولنا.

مريم: ماعلهش، بنت عمه تلاقي لها عريس غيره، الشباب هنا كثير.
لسانتور: ما يمكنش يا ستي. (يقوم ويلبس بورنيطته ويستعد للخروج ويقول لمريم) عن إذك يا ستي.
مريم: رايح فين يا مسيو؟
لسانتور: رايح القونصلاتو أظهر غش وتزوير ابني وخيانتة حتى أبطل الي جرى لغاية الآن (تمسكه من يده وتمنعه عن الخروج).
مريم: يا حضرة الكونت، روق لنفسك، بذك تعمل إيه؟ دي هتيكة وجُرسة. موش لنا بس، دي لحضرتك ولابنك زيادة.
لسانتور: من فضلك اترکيني.

المنظر الثاني عشر

(كارولينا وحسانين والمذكورين)

كارولينا (إلى مريم): الأريسات جُو.
حسانين (إلى مريم): يا ستي مادام، العرسان وصلوا ومعهم الحكيم خربلو.
مريم (إلى لسانتور): الحمد لله، أهُم جُم وتوفر عليك المشوار. روق، روق على شان خاطري.
لسانتور: أنا رايق، فقط بدي أدب ابني.
مريم: لا، لا، لا، سامحو على شان خاطري.

المنظر الثالث عشر

(إبراهيم وفيكتور وعديلة والحكيم خربلو والمذكورين)

خربلو (إلى مريم): أرحنا جينا يا كيريه.
عديلة (تحضن مريم وتبوسها): باركي لي يامي.

فيكتور (ييوس يد مريم): أيوا، لأجل ربنا يتمم بخير.
مريم: الله يهنيكم ويوفقكم ويجعل عيشكم هنا وسرور، ويعطيكم الذرية الصالحة،
ويطلع من أولادكم بيكاوات وباشوات.
خرلبو: وواحد سلطان كمان.
إبراهيم (إلى لسانتور): دا إيه دا؟ حضرتك هنا؟ ومن إمتا؟ الحمد لله بسلامتك.
لسانتور (إلى إبراهيم): أخبرني قبلا، ابني فين؟
مريم (تأخذ فيكتور من يده وتقول إلى لسانتور): آدي ابنك أهوا.
لسانتور (يضحك): هُوا دا ابني؟
مريم (إلى إبراهيم): إزاي موش ابنه دا؟ (إلى فيكتور) يا كفاليير، حضرة الكونت
موش أبوك؟ ما تجاوبوني يا ناس، أنتم خرستم ليه؟ (إلى إبراهيم) رد عليّا إنتا يا بو دقن
شايية؛ دا ابنه ولا ما هوش ابنه؟
خرلبو (إلى مريم): أنا موش كولت لخضرتك الصبخ ديّه أبوه موش كونت؟ دا
اسمه: الكواجة يوسف ابن الكواجة يعقوب.
مريم (تصيح وتقول): غيتوني (وبعد ذلك تقع مغشيّة على الكرسي).
خرلبو: ما تخافوش (يُخرج قزازة من عبه ويشمّمها لها، وعديلة ويوسف يركعوا
بالقُرب منها).
لسانتور (إلى إبراهيم): أنا موش فاهم حاجة من الحكاية دي!
إبراهيم: أنا أفهمّ القضية، بقا عديلة تحب الجدع دا، والجدع دا يحبها، وأنا
رضيت بإنهم يتجوزوا بعض، ولكن الست موش مخلصها ولو إنه ابن ناس. لكن على
شان ما عندوش قطعة شريطة حمرة يسما كفاليير.
لسانتور: وبعدو؟ عملتوا إزاي؟ وابني إيش دخلوا؟
إبراهيم: عديلة كانت قالت إن بين الأمرا الي تشرفنا بمعرفتهم في باريز كنت
حضرتك الي اعتنيت لنا زيادة عنهم، وإن في وقتها ابنك كان غايب، فلما طلبها الجدع
منا واحنا ما قبلناش فكتب جواب سراً لعديلة وقال لها إنه رايح يبيعت جوابين لمريم
باسم فيكتور؛ واحد وصيّة من حضرتك، والثاني بطلب خطوبة البنت من مريم. فالست
مريم فرحت وقبلت وعزمته إنه يتغذّا عندنا، فأنا لما شُفت إن البنت راضية به، وقبلها
بيوم كانت قالت لي ما تتجوزش غير يوسف، مسكتها حتى رَسّنتني على الصّحّة، فعزّفتني
بحقيقة الحال. وبالتصادف تشوشت الست، وكدا صار عقد الشروط وكتب الكتاب في
أثنى مرضها، وإلا كانت تفقس ملعوبنا.

لسانتور: ملعوب كويس قوي، أنا أعرف أبو الشاب دا، وباين على الجدع إنه عاقل ولطيف.

مريم (تفوق): أنا فين؟

يوسف وعديلة: بين أولادك.

إبراهيم (يجري لعندها): وبين جوزك اللي يحبك زي طرطوفة مناخيره.

مريم (إلى إبراهيم): ما تورنيش وشك.

لسانتور (إلى مريم): سامحيه واعفي عنه على شان خاطري، وجبّي الجدع دا لأنه شاطر ويستحق حضرتك.

مريم (إلى لسانتور): لكن ما هوش لا كفاليير ولا كونت ولا هوش شيء من دا أبداً.

لسانتور: ما حدش منا انولد ومعاه رتب. الإنسان يحصل أعلا درجات الشرف بسلوكه الحميد وبأمانته واسمه الطيب؛ لأن الأمير أمير الأخلاق.

إبراهيم (يقلع النيشان الذي في صدره ويعطيه لمريم): ما تزعليش يا حبيبة عيني، خدي نيشاني أهوا وعلّقيه له.

مريم (ترده له): صهري موش عاوز نيشانك. (إلى لسانتور) إحنا نعرف نجيب له نيشانات، موش كدا يا مسيو الكونت؟

لسانتور: ما تفتكريش يا ستي الشاب دا في أقرب وقت بشطارته يصير أعظم الناس.

حسانين: يا ستي مادام، أنا شايف ناس كتير جاين هنا.

إبراهيم: دول المعزومين، يالله ندخل جميعنا في الديوان الكبير ونستقبلهم.

مريم (تقوم وتقول للجميع): يالله بنا (جميعهم يخرجوا ما عدا إبراهيم).

إبراهيم: لك الحمد يارب بإنك فرحتني على آخر الزمان، وخليتني أطلع بكلمتي ولو بملعوب وأغيظ المادام (ثم تنقل الستارة).

(تمّ بخير.)

